

摘藻堂四庫全書薈要

史部



欽定四庫全書叢書要卷九千一百六十九

史部

通典卷五十一

唐 京兆杜佑君卿纂

禮十一 吉十

天子七祀

諸侯附  
晉 隋

殷 周  
大唐

漢 後漢  
魏

殷制天子祭五祀戶一竈二中雷三門四行五祀歲徧

凡祭五祀於廟門戶主出入竈主飲食中雷主堂室居處韋昭云古者穴居故名室曰中雷行主道路行作者

諸侯大夫與天子同○周制王為羣姓立七祀曰司命



曰中雷曰國門曰國行曰泰厲曰戶曰竈

此七神居人之間司察小

過作譴告者司命督察人三命厲主殺罰司命與厲其時不著是則春祀司命秋祀厲也或者合而祀之也

諸侯為國立五祀曰司命曰中雷曰國門曰國行曰公

厲大夫立三祀曰族厲曰門曰行嫡士立二祀曰門曰

行庶人立一祀或立雷竈或立戶○漢立五祀白虎通

云戶一祀

春萬物觸戶而出亦為陽氣之生欲由之即祭戶戶者人所出入者

竈二祀

夏

主長養萬物即祭竈竈者火之主入所以自養也

門三祀

秋萬物成熟將內之從外而入內自守而

祭門門者所以閉歲

井四祀

冬水主萬物伏歲而祭井井者水主歲在冬

中雷五祀

六



土王而祭中雷者  
象土位在中也

歲一徧有司行事禮頗輕於社稷

祭祀

天子諸侯以牛因四時祭牲也祀戶以羊竈以雞中雷以牛門以犬井以豕或曰中雷用牛不得用牛者用豕

井用魚也

○後漢建武初有五祀之祭門戶井竈中雷有司

掌之其祀簡於社稷矣人家祀山神門戶

山即厲也鬼有所歸乃不

為厲○魏武王始定天下興復舊祀而造祭五祀門戶井

竈中雷也○晉傅玄云帝之都城宜祭一門正宮亦祭

一門正室祭一戶井竈及中雷各擇其正者祭之以後

諸祀無聞唯司命配享於南郊壇○隋制其司命戶以



春竈以夏門以秋行以冬各於享廟日中雷則以季夏

祀黃帝日

夏季土德王

各命有司祭於廟西門道南牲以少

牢○大唐初廢七祀唯季夏祀祭中雷開元中制禮祭  
七祀各因時享祭之於廟庭司命戶以春竈以夏門厲  
以秋行以冬中雷以季夏其儀具開元禮○說曰天子  
諸侯必立五祀五祀者為其有居處出入飲食之用祭  
之所以報德也歷代同或五或七周禮天子祭七諸侯  
祭五降殺之差也殷天子諸侯大夫皆五鄭注云殷禮



者以祭法差降殊異故言之鄭又云祭竈祀老婦人古之治炊者也以此推之七祀皆應古之始造者焉馬融以七祀中之五門戶竈行中霤即勾芒等五官之神配食者勾芒食於木祝融食於火蓐收食於金玄冥食於水勾龍食於土故月令五時祭祀只是金木水火土五行之祭也許慎云月令孟夏祀竈王者所祭古之有功德於人非老婦也鄭玄云為祭五祀竈在廟門外之東祀竈禮設主於竈陞祝融乃古火官之長猶后稷為堯



司馬上公也今但就竈陜而祭之屈上公之神何其陋也又月令云其帝炎帝其神祝融文列在上與祀竈絕遠而推合之文義不次焉得為義也又左傳云五官之神生為上公死為貴神若祭之竈陜豈得謂貴神乎特牲饋食禮云尸諤而祭饔饗以謝先炊者之功知竈神是祭老婦報先炊之義也臧文仲燔柴竈夫子譏之云盛於盆罇於瓶若是祝融之神豈可以盆瓶之器置於陜而祭之乎鄭冲云五祀雖出天地之間陰陽之氣實



非四時五行陰陽之正者也月令春祀戶祭先脾秋祀  
門祭先肝此順氣所宜歲所值耳又司命則司命星下  
食人間司譴過小神矣袁準著正論以為五行之官祭  
於門戶行竈中雷土神也火王祀竈而水王不祀井非  
其類也且社奚為於人家之屋棟間哉禮記王七祀諸  
侯五大夫三冬其祀行是記之誤也井不輕於竈行不  
唯冬白虎通云月令冬祀井是也秦靜云今月令謂行  
為井是以時俗或廢行而祀井魏武興復舊祀而祭門



戶井竈中雷凡五祀焉

按漢諸儒戴聖聞人通漢等白虎通議五祀則有井之說蓋當

時已行中間廢闕至魏武重修舊典而祭井焉

高堂生月令仲冬祀四海井泉

祭井自從小類不列五祀儒家誤以井於五祀宜除井而祀行傳玄曰七祀五祀月令皆云祀行而無井月令先儒有直作井者既祭竈而不祭井於事則有關於情則有不類謂之井者近是也又按白虎通曰共工之子曰修好遠遊舟車所至足跡所達靡不窮覽故祀以為祖

神

祖者祖也祖即行之義也



宗室助祭議

後魏

後魏孝明帝熙平二年侍中江陽王繼表言臣功總之內太祖道武皇帝之後於臣始是曾孫道武帝受命之主配天郊祀百代不遷而曾玄之孫烝嘗之薦不獲拜於廟庭霜露之感闕陪奠於階席伏見孝文皇帝著令銓衡取曾祖之服以為資蔭而况曾祖為帝而不見錄請付外博議永為定准小學博士王僧奇等議按孝經曰郊祀后稷以配天宗祀文王於明堂以配上帝然則



太祖不遷者尊王業之初階二祧不毀者旌不朽之洪烈其旁枝遠胄豈得同四廟之親哉而四廟者在當代服屬之內可以與於子孫之位若廟毀服盡豈得同於此例乎請以四廟為斷國子博士李琰之議按祭統曰有事於太廟羣昭羣穆咸在謂宜入廟之制率從親議之條祖祧之旁各盡其玄孫使得駿奔堂壇肅承禘祫則情理差通事無舛駁侍中任城王澄等奏臣等叅議江陽之於今帝也計親則枝宗三易數代則廟應四遷



吉凶尚不告聞拜薦寧容輒與高祖孝文皇帝聰明玄覽師古立政陪拜止於四廟哀恤斷自總宗即之人情冥然符一推之禮典事在難違此所謂明王今古不革者也太常少卿元端議祭法云王立七廟曰考廟曰王考廟曰皇考廟曰顯考廟曰祖考廟遠廟為祧有二祧而祖考以功重不遷二祧以盛德不毀迭遷之義其在四廟記云五廟之孫祖廟未毀雖為有所援引然與朝儀不同如依其儀匪直太祖曾玄諸廟子孫悉應陪列



既無正據竊謂太廣靈太后令曰議親律注云非唯當代之屬籍歷謂先帝之五代此乃明親親之義篤骨肉之恩重公卿衆議以遠及諸孫太廣致疑百僚助祭可得言狹也祖廟未毀曾玄不與壇堂之敬便是宗人之昵反外於附庸王族之近更疎於羣辟先朝舊儀草創未定刊制律憲垂之不朽琰之援據甚允情理可依所請

庶子攝祭

周



周制曾子問宗子為士庶子為大夫其祭如之何孔子

曰以上牲祭於宗子之家

貴祿重宗也上牲大夫少牢

祝曰孝子某

為介子某薦其常事

介副也不言庶使若可以祭然

若宗子有罪居於

他國庶子為大夫其祭也祝曰孝子某使介子某執其

常事

此為宗子攝大夫也

攝主不厭祭不旅不嘏不綏祭不配

皆避

正主也厭厭飲神也厭有陰有陽迎尸之前祝酌奠之  
且饗是陰厭也尸謬之後徹薦俎敦設於西北隅是陽  
厭也此不厭者不陽厭也不旅不旅酬也不嘏不嘏主  
人也不綏祭謂今主人也今主人謂攝主者若正主人  
即得綏殺謂減毀神前饌若神有饗也不配者  
祝辭不言以某配某氏也綏許恚反敦音對布奠於



賓賓奠而不舉

布奠謂主人酬賓解奠於薦北也賓奠謂取解奠於薦南也此酬之始也奠而

不舉止不歸肉

肉俎也諸與祭者召之共燕耳

其辭於賓曰宗兄弟宗

子在他國使某辭

辭猶告也宿賓之辭也與宗子為列則曰宗兄若宗弟昭穆異者曰宗子

而已其辭若云宗兄某在他國使某執其常事使某告也

曾子問宗子去在他國庶

子無爵而居者可以祭乎孔子曰祭哉

有子孫存不可以乏先祖之祀

請問其祭如之何孔子曰向墓而為壇以時祭

不祭於廟無爵

者賤遠避正主

若宗子死告於墓而後祭於家

言祭於家容無廟也

宗子

死稱名不言孝

孝宗子之稱不敢與之同也其辭但言子某薦其常事也

身歿而已



至子可以稱孝者也子游之徒有庶子祭者以此以用也用此禮祭也若義

也若順今之祭者不首其義故誣於祭也首本也

庶子在他國不立廟議晉

晉劉氏問蔡謨曰非小宗及一家之嫡分張不在一處

得立廟不答曰禮宗子在他國而庶子在家則祭先儒

說曰有子孫在不可以乏先祖之祀也不貳祀云者明宗子在他國不

得廟祭故令庶子祭於家也苟在他國雖是宗子猶不得立廟况非

嫡長乎



兄弟不合繼位昭穆議

晉

東晉

大唐

晉武帝泰始四年詔荀崧紹高祖或封爵繼崧兄敬侯  
崧父太尉顗以為宜依文帝景帝同為一穆崧顧命子  
蕤垂範遵而奉焉○東晉元帝建武中尚書符云武皇  
帝崩遷征西府君惠皇帝崩遷章郡府君懷帝入廟當  
遷潁川府君賀循議古者帝各異廟廟之有室以象常  
居未有二帝共處之義也如惠懷二主兄弟同位於禘  
祫之禮會於太祖自應同列異坐而正昭穆至於常居



之室不可以尊卑之分義不可黷故也昔魯夏父弗忌  
躋僖公於閔上春秋謂之逆祀僖公閔之庶兄閔公先  
立嘗為君臣故也左氏傳曰子雖齊聖不先父食懷帝  
之在惠帝代居藩積年君臣之分也正位東宮父子之  
義也雖同歸昭穆尊卑之分與閔僖不異共室黷黷非  
殊尊卑之禮以古義論之愚謂未必如有司所列惠帝  
之崩當已遷章郡府君又以懷帝入廟當遷潁川府君  
此是兩帝兄弟各遷一祖也又主之迭毀以代為正下



代既升則上代稍遷代序之義也若兄弟相代則共是  
一代昭穆位同不得兼毀二廟禮之常例也又殷之盤  
庚不序陽甲之廟而上繼先君以弟不繼兄故也既非  
所繼則廟應別立由此言之是惠帝應別立上祖宜兼  
遷也故漢之光武不入成帝之廟而上繼元帝義取於  
此今惠懷二帝不得不上居太廟潁川未遷見位餘八  
非祀之常不得於七室之外假立一神位庾蔚之謂爾時愍帝尚在  
闕中元帝為晉王立廟猶以愍帝為主故上至潁川為  
六代懷景二帝雖非昭穆之正數而廟不合毀是以見



位餘八也。循又議曰：殷人六廟，比有兄弟四人，襲為君者便。

當上毀四廟乎？如此四代之親盡，無復祖禰之神矣。又按殷紀成湯以下至於帝乙父子兄弟相繼為君，合十二代而正代唯六。易乾鑿度曰：殷帝乙六代王也。以此言之，明不數兄弟為正代。○大唐開元四年，太常卿姜皎及禮官太常博士陳貞節、蘇獻等上七廟，昭穆議曰：禮天子三昭三穆，與太祖之廟為七。而太祖常存，聖人之大典也。若禮名不正，則奠獻無序矣。謹按中宗孝和



皇帝在廟七室已滿今太上皇是中宗之弟以六月升遐甫及仲冬禮當遷祔但兄弟入廟古則有焉遞遷之禮昭穆須正謹按晉太常賀循議兄弟不相為後也故殷之盤庚不序於陽甲而上繼於先君漢之光武不嗣於孝成而上承於元帝又曰晉惠帝無後懷帝承統懷帝自繼於代祖而不繼於惠帝其惠帝當陽甲孝成別出為廟又曰若兄弟相代則共是一代昭穆位同不可兼毀二廟此蓋禮之常例荀卿子曰有天下者事七世



謂從禰以上尊者統廣故恩及遠祖若旁容兄弟上毀  
祖考此則天子有不得全事七代之義也孝和皇帝有  
中興之功而無後嗣請同殷之陽甲漢之成帝出為別  
廟時祭不虧大祫之辰合食太祖奉睿宗神主升祔太  
廟上繼高宗則昭穆永貞獻裸長序禮也萬代之典敢  
不颺言從之改造中宗廟於太廟之西時河南人孫平  
子上封事曰臣竊見今年正月太廟毀此乃躋聖賢之  
所致也臣按左傳曰君薨卒哭而祔祔而作主特祀於



主烝嘗禘於廟今日有違於此也昔魯文公二年宗伯弗忌躋僖公於閔公上後致太室壞春秋異而書之今日有同彼也君子以弗忌為失禮又按五行志書僖公雖閔公之兄嘗為閔公臣臣在君上是為失禮遂令太室壞且兄臣於弟猶不可躋之弟上弟臣於兄可躋弟於兄上耶昔莊公三十二年薨閔公二年吉禘自薨至禘尚有二年春秋猶非其失禮况夏崩冬禘不亦太速乎諸議云太廟中央曰太室尊高象也魯自陵夷將墜



周公之祀以此斷之即太廟毀亦今日將欲陵夷之象  
隆先帝之祀也斯亦上天祐我唐國乃降此災以陛下  
去年禘孝和於別室吉祭於太廟未祭孝和先祭太上  
皇此乃與僖閔事同先臣後君也昔兄躋弟上今弟先  
兄祭過有甚於古也昔臣登君上今亦如之事豈不同  
耶昔太室壞今聖朝太廟毀變豈不同耶若以兄弟同  
昭則不合出致別廟若以臣子一例則孝和合進為昭  
昔武氏篡國十有餘年孝和挺劍龍飛再興唐祚此則



有大功於天下也今禘於別室是廢先聖之訓棄中興之功君下臣上輕長重幼昔晉太康五年宣廟地陷梁折八年正月太廟毀陷改作殿築階下及泉更營新廟遠致名材雜以銅柱自八年九月造至十年四月乃成十一月又梁折毀壞以此言之天降災譴非枯朽也晉不知過天下分崩王室大亂特望天恩少垂詳察速召宰相以下謀議移孝和入廟何必苦違禮典以同魯晉哉詔下禮官議蘇獻固執前議平子口辨所稱咸有經



據蘇頲為宰相獻即頲從祖兄平子竟被貶為康州都  
城尉至任尋卒

兄弟俱封各得立禰廟議

晉 宋

晉中山王睦上言乞依六蓼之祀臯陶杞鄩之祀相立  
廟按睦譙王之弟兄弟俱封今求各立禰廟下太常議  
博士祭酒劉喜等議王制諸侯五廟是則立始祖謂嫡  
統承重一人得立祖禰之廟羣弟雖並為諸侯始封之君  
未得立廟也唯今正統當立祖廟中山不得並也後代



中乃得為睦立廟為後代子孫之始耳司徒荀顗議以  
為宜各得立廟時詔從顗議又詔曰禮諸侯二昭二穆  
與太祖之廟而五太祖即始封君也其廟不毀前詔以  
譙王中山王父非諸侯尊同禮不相厭故欲令各得祭  
以申私恩也然考之典制事不經通若安平王諸子並  
封皆得立廟祭禰親盡數終其廟當毀無故下食支庶  
之國猥更隨昭穆而廢非尊祖敬宗之義也其如前奏  
施行虞喜曰譙與中山俱始封之君父非諸侯尊同體



敵無所為厭並立禰廟恩情兩伸苟議是也詔書所喻  
恐非禮意今上祭四代自以諸侯位尊得申其恩祭及  
四代不論毀且不毀為始封之君則譙王雖承父統禰  
廟亦在應毀之例不得長立也又安平獻王自為始封  
諸子雖別封而同為諸侯諸侯尊同故不復各立此則  
公子為諸侯不得立禰廟也而譙王父非諸侯使與諸  
侯同列不得並祭或難曰禮庶子不祭禰明其宗也若  
俱得祭父則並統二嫡非明其宗也答曰若宗子與庶



子位俱為士禰已有廟無為重設與公子為諸侯不立  
禰廟同也若尊卑不同則已恩得施並祭無嫌也禮大  
夫三廟太祖百代不遷者也使大夫之後有庶統為諸  
侯者當上祭四代四代之前不得復祭若當奪宗則大  
夫太祖為廢其祀以此推之明得兼祭一者恩得伸隨  
代而毀一者繼太祖百代不替也徐禪非荀是虞曰愚  
等謂尊祖敬宗禮之所同若列國秩同則祭歸嫡子所  
以明宗也嫡輕庶重禮有兼享所以致孝也今譙王為



長既享用重祿中山之祀無以加焉二國兩祭禮無所  
取詔書禁之是也詔稱安平獻王諸子並封不可各令  
立廟是荀暢之義美矣然虞謂中山父非諸侯而祭更  
闕疑如禮意也虞徵士答衛將軍虞喜以嫡為大夫庶  
為諸侯諸侯禮重應各立廟禪謂為允矣喜曰尊同體  
敵恩情兩伸諸兄弟俱始為諸侯命數無降今士庶始  
封之君尚得上祭四代不拘於嫡以貴異之況已尊同  
五等更嫌不得其均用豐禮並祭四代所以寵之理非



僭宗此蓋先王以孝理天下肅恭明祀之達義也昔周

公有王功魯立文王之廟鄭有平王東遷之勲特令祖

厲是為榮之非計享之祭在於周室魯鄭豈得過之哉

○宋庾蔚之謂大夫士尊不相絕故必宗嫡而立宗承

別子之嫡謂之宗子收族合食糾正一宗者也故特加

齊縗三月之服至四小宗則服無所加唯昆弟之為人

後姊妹雖出一降而已曾子問宗子為士庶子為大夫

以上牲祭於宗子之家鄭云貴祿重宗也

上牲大夫少牢也小



記庶子不祭禰者明其宗也

明尊宗不敢別祭也

至諸侯尊絕大

夫不得以太牢祭卿大夫之家是以經無諸侯為宗服文則知諸侯奪宗各自祭不復就宗祭也又諸侯別子封為國君亦得各祭四代何以知其然諸侯既不就祭人子不可終身不得享其祖考居然別祭四代或疑神不兩享舉魯鄭祭文祖厲足以塞矣余以弟祿卑於兄不得兩祭虞以為可兩祭由於父非諸侯又未善也

遭難未葬入廟議

晉



晉懷帝蒙塵崩於平陽梓宮未反京師元帝立廟之時  
欲遷入廟喪已過三年太常賀循議云懷帝梓宮未反  
遭時之故事難非常不得以常禮自拘宜以時入太廟  
修祭祀之禮

亡失其親立廟議晉

晉劉智釋問曰亡其親者不知其死生則不敢服然則  
終身不祭乎智曰唯疑其生故不敢服也必疑死焉可  
不祭乎古之死者必告於廟今亡其親必告其先廟使




咸知之求之三年若不得也則又告之告之者欲令其  
生也則隨而祐之其後疑祭必告令知其疑不受也鬼  
死者終歸饗也祝辭以告疑則還廟不遷矣憑靈之心  
加崇於尊此孝子之情也





通典卷五十一





總校官庶吉士臣侍朝

校對官編修臣莫瞻菜

膳錄監生臣周翥華



欽定四庫全書薈要

史部

通典卷五十三

詳校官員外郎臣楊世綸





欽定四庫全書薈要卷九千一百七十

史部

通典卷五十二

唐 京兆杜佑君卿纂

禮年二 吉十一

喪廢祭議

晉

宋

齊

梁

大唐

晉武帝咸寧五年十一月弘訓羊太后崩宗廟廢一時  
之祀天地明堂去樂且不上阼孝武帝太元十一年九  
月皇女亡應祚祠中書侍郎范甯奏按禮喪服傳有死



宮中者三月不舉祭不別長幼之與貴賤也皇女雖曰

嬰孩臣竊以為疑於是使三公行事

賀循祭議云禮在喪者不祭祭吉事

故也其義不但施於生人亦祖禰之情同其哀戚故云於死者無服則祭也今人若有服祭祀如故吉凶相干非禮意也○宋文帝元嘉七年四月有司奏禮云有死於宮

中者三月不舉祭今初祀既戒而掖庭有故下太常詳

正領祠部郎謝元議以為遵依禮傳使有司行事於義

為安從之○齊高帝建元四年武帝在諒闇尚書令王

儉奏曰權典既行喪禮斯奪事興漢代源由甚遠殷宗



諒闇非有服之稱周王即吉雖宴樂為譏春秋之議嗣  
君踰年則會聘左氏云凡君即位卿出並聘踐修舊好  
謀事補闕禮之大者自斯而談朝聘燕嘗之典卒哭而  
備行婚禮禘蒐樂之事三載而後舉通塞興廢各有由然  
按禮稱武王崩明年六月既葬周公冠成王而朝於祖  
以見諸侯又曾子問孔子曰天子崩國君薨則祝取羣  
廟之主而歲諸祖廟禮也卒哭成事而後主各反其廟  
左氏傳凡君卒哭而祔祔而後特祀於主燕嘗禘於廟



先儒云特祀於主者特以喪禮奉新亡者主於寢不同於吉烝嘗禘於廟者卒哭成事羣廟之主各反其廟則四時之祭三年喪畢吉禘於廟躋羣主以定新主也皆皆即吉也

著在經誥晉宋因循同規前典卒哭公除親奉烝嘗率禮無違因心允協爰至宋明帝時禮官立議不宜親奉乃引三年之制自天子達庶人曾不知本在至情既葬釋除事以權奪越紳之旨事施未葬卒哭之後何紳可越晉武在喪每欲伸寧戚之懷不全依諒闇之典至於四時烝嘗蓋以哀疚未堪非便頓改舊式江左通儒守



而弗革又宜即心而言公卿大事則負宸親臨三元告  
始則會朝萬國豈曰能安國家故也宗廟烝嘗孝敬所  
先寧容吉事備行斯典獨廢就令必宜廢祭則應三年  
永闕乃復同之他故有司攝禮進退二三彌乖喪典謂  
宜依禮親奉從之○梁武帝天監四年安成國稱欲遷  
立所生吳太妃神主國王既有妃喪欲使臣下代祭明  
山賓議以為宜待王妃服除親奉盛禮○大唐元陵之  
制未殯遇夏至祭皇地祇禮官議停祭時監察御史張



朔牒禮儀使伏准遺詔皇帝已聽政合告郊廟所司祭地祇無文合廢又按曾子問天子崩未殯五祀之祭不行既殯而祭所言五祀不行即明天地之祭不合廢又王制喪三年不祭唯祭天地社稷為越紼而行事注云不敢以卑廢尊又按春秋杜預注天王崩未葬而郊者不以為王事廢天事也今禮儀使牒引祠令諸饗廟官有總麻以上喪不得充饗官此蓋指私喪不足為今日之證請更參詳報禮儀使報來牒稱天子崩五祀之祭



不行既殯而祭所言五祀不行即明天地之祭不合廢者謹按曾子問天子崩五祀之祭不行既葬而祭鄭玄注云郊社亦然然則五祀之與郊社之祭同也則來牒所言五祀不行則明天地之祭不合廢與鄭玄所云郊社亦然之義乖也又按曾子問上文曰天子嘗禘郊社五祀之祭簠簋既陳天子崩后之喪如之何孔子曰廢下文云天子崩未殯五祀之祭不行既殯而祭孔穎達云以初崩哀戚未遑祭祀雖當五祀祭時不得行也既



殯哀情殺而後祭也又云自啓至於反哭五祀之祭不行已葬而祭此言無事時則祭有事時則廢未殯以前是有事既殯已後未啓已前為無事故王制云越紼而行事紼者屬於龍輶之轅索也天子攢塗龍輶謂殯時所設也今百官成服准令祀諸祠齋之日平明赴祠所又開元禮云祠前七日受誓戒散齋四日致齋三日散齋之內不得弔死問病致齋之內唯祀事則行其餘悉斷苟或違此則非為祭所以崇嚴潔也今若斂髮赴廟



則嚴潔之道於是乎廢也成服而行則祀典之文可得而踰也且哀戚之殺大斂孰與夫自啟凶穢之甚總麻孰與夫斬縗未殯之時非謂無事扱衽之祭可謂不違況皇帝即位未告太廟哀戚在疚未許聽政如何告太祖以配北郊乎參詳古今實難議祭也

旁親喪不廢祭議

東晉

東晉穆帝太和六年五月九日安平王薨博士孫欽議禮有死於宮中闕一時之祀又按魏高堂隆議平原公



主薨二月春祀不宜闕祭臣聞伯叔父同產昆弟庶子庶孫及次妃以下天子諸侯則降而不服於四時之祭無闕廢禮也漢文帝前代盛德之君也猶不忍以三年之喪妨廢孝享割損年月早葬速除追思祖考念在烝嘗所以重宗廟也且宮中有死者三月不舉祭傳發於總麻三月之章天子諸侯周大功皆降而不服何總麻之有乎誠亦儒者之迷誤也

總不祭議

晉 宋



晉荊州刺史殷仲堪問禮文如是此指釋有總麻服而猶得祭者也當不普言新喪之親於所祭者耶別駕庾叡功曹滕惔主簿劉恬答曰尋禮文當是指明有總服可以祭耳不以新喪之親於所祭者有服為疑今世中傳重者而有從祖小功之服服既除恐不得以二祖服近而不祭也○宋庾蔚之謂殷庾釋文句甚允但未統立言大意記所明重其已與神交而不終外喪尸殯不在此可得少申其事故大夫之祭鼎俎既陳籩豆既設



內喪小功總麻外喪齊縗以下行特為已與神交故隨輕重各有所行又云士之所以異總不祭者加大夫有小功總麻皆廢故鄭云然則士不得成禮者十一也又云所於死者無服則祭者言所異於未與神交時有此則外內之喪通廢士卑故也言有始末義統有本尋禮者多斷取義不辯已與神交之異故申之云

奪宗議 晉

晉元帝建武初孫文上事宣帝支子不應祭豫章京兆



二府君僕射刁協云諸侯奪宗聖庶奪嫡而況天子乎  
自皇祚以來五十餘年宗廟已序而文攻乎異端宜加  
議罪按漢梅福云諸侯奪宗此謂父為士庶子封為諸  
侯則庶子奪宗嫡主祭祀也在諸侯尚有奪義而況天  
子乎所言聖庶者謂如武王庶子有聖德奪代伯邑考  
之宗嫡也

殤及無後廟祭議

宋

宋孝武皇帝孝建元年有司奏東平冲王年幼無後唯



殤服五月雖臣不殤君應有主祭而國是追贈又無其  
臣未詳毀靈立廟為當他祔太學博士徐宏議王既無  
後追贈無臣殤服既竟靈便合毀記曰殤與無後者從  
祖祔食又曰士大夫不得祔於諸侯祔諸祖之為士大  
夫者按冲王則宜祔諸祖之為王者應祔長沙景王廟  
詔可大明六年有司奏故晉陵孝王子雲未有嗣安廟  
後三日國臣從權制除釋晦朔周忌應還臨哭與不又  
祭之日誰與為主太常丞庾蔚之議靈筵存諸臣宜還



臨哭變服使上卿主祭王既未有後又無三年服者周親服除而國尚存便宜立廟為國之始祖服除之日神主暫祔食祖廟還居新廟之室未有嗣之前四時饗薦常使上卿主之詔可七年十一月有司奏晉陵國制孝王廟依廬陵等國例一歲五祭二國以王有衡陽王服今年內不祠尋國未有嗣王三卿主祭應同無服者之例與不左丞徐爰議嗣王未立將來承胤未知疎近豈宜空計服屬以虧祭敬詔可八年有司奏故齊敬王子



羽未立後未詳便應作主立廟為復有後之日未立廟者為於何處祭祀爰議以為國無後於制服除罷始封之君實存繼嗣皇子追贈為始祖臣不殤君著在前經豈容虛闕烝嘗以俟有後謂宜立廟作主三卿主祭依舊

祭殤

周 晉

周制曾子問祭殤必厭盖弗成也

厭飫而已弗成其為人故其禮不備

祭成喪而無尸是殤之也

與不成人同也

孔子曰有陰厭有陽



厭

言祭殤之禮有於陰厭之者有於陽厭之者

曾子問曰殤不備祭何謂陰

厭陽厭

言殤乃不成人祭之不備禮也而云陰厭陽厭乎失孔子旨也祭成人始設奠於奧迎尸之前

謂之陰厭尸諤之後改饌於西北隅謂之陽厭殤則不備也

孔子曰宗子為殤而死

庶子弗為後也

族人以其倫代之明不序於昭穆立之廟也其祭之就其祖而已代之者主其

禮也按此殤未成人無立後之道故取於族人之中兄弟之倫而主其祭其祭之就所祭者之祖服除乃止

其吉祭特牲

尊宗子從成人也凡殤則特豚自卒哭成事之後為吉祭也

祭殤不舉

肺無所俎無玄酒不告利成

此其無尸及所降也其他如成人舉肺脊所俎利成

禮之施於尸者所音祈

是謂陰厭

是宗子而殤祭之於奧之禮也小宗為殤其祭禮亦如之凡



殤與無後者祭於宗子之家當室之白罇於東房是為

陽厭

凡殤謂庶子之嫡也或昆弟之子或從父昆弟無後者如有昆弟及諸父此則今死者皆宗子大功

之內親共祖禰者也言祭於宗子之家者為有異居之道也無廟者為禋祭之親者供其牲物宗子皆主其禮當室之白罇於東房異於宗子之為殤也當室之白謂西北隅得戶明者也明者曰陽凡祖廟在小宗之家小宗祭之亦然宗子之嫡亦為祭法王下祭殤五嫡子嫡凡殤過此以往則不祭也

孫嫡曾孫嫡玄孫嫡來孫諸侯下祭三大夫下祭二嫡

士及庶人祭子而止

祭嫡殤者重嫡也祭嫡殤於廟之與謂之陰厭王子公子祭其嫡殤

於其黨之廟大夫以下祭其殤於宗子之家皆當室之白謂之陽厭凡庶殤不祭也蜀譙周云庶子之為殤者



祔祠於祖廟庶子共其牲物而宗子主其禮士庶人之庶子雖成子而無後亦祔祠於祖其主之如祭殤殤及無後者祔祠於祖廟皆異日別祭於其處耳天子諸侯之庶子無子不得祔祠於其廟當從其庶祖昭穆同也

○晉范甯祭殤議云祭法王祭嫡殤下及五代愍懷太子殤太子哀太孫冲太孫自是先帝嫡殤歷代彌久而廟祀之禮於今未廢謂非禮典之意宜從埋主之例

未立廟祭議

晉

晉安昌公荀氏祠制云荀氏進封大國今祭六代暫以廳事為祭室須立廟如制備物殷仲堪問庾敳綱紀有



承重之身身服已除其應祭吾尚有服當得於廳事上

祭不

按殷宗有五等封

庾叡等答曰宜在別室又問云依禮祭

皆於宗子之家支子每往助祭耳又如吾家五等封乃  
應有廟今既無廟而共家常以廳事為烝嘗之所今一  
朝忽移別室意殊不安劉功曹答云昔魯襄公尚於兄  
弟之廟假鐘磬以成禮今於廳事當無嫌也

公除祭議

東晉

宋

東晉成帝咸和七年虞潭上表云今之諸侯服其親皆



與士同無復降殺太宗之家喪服累仍若皆不祭是先

人之享嘗永為有廢

或難曰士獨非孝子也答曰士賤不得伸其意也

臣謂三

月之後禮情漸殺若非父母之喪尚通內外服踰月既

葬可祭宗廟博士通議宜如潭所上會有軍事未及施

行咸康三年十月二十七日虞潭有嗣子喪既葬依令

文行喪三十日至十二月十日公除其日禘祭宗廟

潭自

為論曰余身受公除歲終大禘至敬兼興如當遂闕心  
所不安故諮之有議難曰禮素衣芻席不入廟門不以  
干神明之位總喪雖輕脫服而祭況嗣子當承祚者乎  
答曰高宗三年諒闇今則不爾帝王既葬縞素躬親宗



廟之獻不以喪遂闕者蓋國之大事在祀與戎也且吉祭廷有金石鏗鏘之和今去凶制而奉烝嘗干戚戢而不振慎終之情不遠

徐藻議云古無公除吉凶之服不隨時之義亦通也

可相干故總不祭耳今既公除吉服而行則可吉祭今既吉服無事不可而大事反可闕耶若以心喪為疑者則出母子為父後得以含悲而祭矣又禮有死宮中三月不舉祭齊縗之禮三月不從政意者雖速公除猶宜待滿三月又問同宮之喪而未葬雖公除可以祭不答曰公除不祭本與於外喪耳若同宮之喪雖未葬此不



可也○宋庾蔚之謂公除是公家除其喪服以從公家之吉事若公家無齋禁則其受弔臨靈及私常著喪服豈得輒釋凶服以執吉祭乎徐藻乃云外喪公除雖停殯可吉祭恐此非祖禰之所享也兄弟別居便為外喪未葬公除而可以烝嘗未之聞也

上陵

拜掃及諸節上食附

東晉

宋

後魏

大唐

漢

後漢

魏

晉

三代以前無墓祭至秦始皇起寢殿於墓側○漢因秦上陵皆有園寢故稱寢殿起居衣服象生人之具古寢之



意也○後漢都雒陽以關西諸陵久遠但四時特牲祀

每帝西幸即親謁其雒陽陵每正月上丁祀郊廟畢以

次上陵百官四姓親家婦女公主諸大夫

袁宏漢紀曰明帝永平九

年為外戚樊氏郭氏陰氏馬氏諸子弟立學號曰四姓小侯獨斷曰凡與先后有瓜葛者

外國朝者

侍子郡國計吏會陵晝漏上水大鴻臚設九賓隨立寢

殿前

薛綜曰九賓謂王侯公卿二千石六百石下及郎吏匈奴侍子凡九等也

鐘鳴謁者贊

禮引客羣臣就位如儀乘輿自東廂下太常導出西向拜折旋升階拜神座退後公卿羣臣謁神座太官上食



太常樂奏食舉舞文始五行之舞

文始舞者本舜韶舞也高祖更名文始以

示不相襲也五行舞者本周舞也秦始皇更名五行之舞也

樂閔羣臣受賜食畢郡

國上計吏以次前當神軒告其郡國穀價人所疾苦欲

神知其動靜孝子事親盡敬愛之心也

謝承後漢書曰帝建寧五年正

月車駕上原陵蔡邕為司徒掾從公行到陵見其儀幟然謂同座者曰聞古不墓祭朝廷有上陵之禮始為可損今見其儀察其本意乃知孝明至孝惻隱不可易舊或曰本意云何昔在長安時其禮不可盡得聞也光武即世始葬於此明帝嗣位踰年羣臣朝士感先帝不復聞見此乃躬帥公卿百僚就園陵而朔馬尚書階西祭設神座天子事亡事存之意也以帝聖孝之心親服三年又在園陵初興此儀仰察几筵下顧羣臣悲切之心



必不可堪邕見太傅胡廣曰國家禮有煩而不省者昔不知先帝用心周密之至於此也廣曰然子當載之以示學者邕退而記焉

最後親陵遣計吏賜之帶佩八月飲酎上陵

禮亦如之

丁孚漢儀曰酎金律文帝所加以正月朝作酒八月成名酎酒因令諸侯助祭貢金漢律

金布令諸侯列侯各以人口數率千口奉金肆兩奇不滿千口至五百以下者皆會酎少府受之又九真交趾日南則用犀角二長九寸以上若玳瑁甲一鬱林邑用象牙長三尺以上若翠各二十准以當金漢舊儀曰武帝於八月酎皇帝暮視牲以鑑燧取水於月取火於日為明水火左袒以水沃牛右肩手執鸞刀以切牛尾之毛即更衣侍中上熟乃祀至靈帝皆以弦晦二十四氣伏社臘及四

時祀祠廟日上飯太官人隨鼓漏理被枕盥水陳嚴具



○魏文帝詔曰先帝躬履節儉遺詔省約子以述父為孝臣以繼事為忠古不墓祭皆設於廟先帝高平陵上殿皆毀壞車馬還殿衣服藏府以從先帝儉德之志遂革上陵之禮及齊王在位九載始一謁高平陵○晉宣王遺令子弟羣官皆不得謁陵景文遵旨武帝猶再謁崇陽陵景帝陵一謁峻平陵文帝陵然遂不敢謁高原陵宣帝陵至惠帝復止也○東晉元帝崩後諸公始有謁陵辭陵之事蓋由眷同友執率情而舉也成帝時中宮亦年



年拜陵議者以為非禮遂止穆帝時褚太后臨朝又拜

陵帝時幼也孝武崩驃騎將軍會稽王道子曰今雖制

釋服至於朔日月半諸節自應展情陵所以一周為斷

於是至陵變服單衣煩瀆無准非禮也及安帝元興元

年左僕射桓謙奏百僚拜陵起於中興非晉舊典積習

生常遂為近法尋武帝詔乃不使人主諸王拜陵及義

熙初又復江左之舊○宋文帝每歲正月謁初寧陵武帝

陵孝武明帝亦每歲拜初寧長寧陵文帝○後魏太和



十六年九月辛未孝文帝哭於文明太后陵左終日不絕聲素幕越

音活

席為次侍臣侍哭壬申孝文又哭如昨

帝二日不御食癸酉朝中夕三時哭拜於陵前夜宿鹽元殿是夜次甲戌帝拜哭辭陵還永樂宮○大唐貞觀十三年太宗朝於獻陵先是日宿設黃麾仗周衛陵寢至是質明七廟子孫及諸侯百僚蕃夷君長皆陪列於司馬門內太宗至小次降輿納履哭入闕門西再拜慟絕不能興禮畢改服入於寢躬親執饌閱視高祖先后



服御之物悲慟左右侍御者莫不歔歔禮畢太宗出自  
寢宮步過司馬門泥行二百餘步上入寢哭踊絕於地  
進至東階西向再拜號慟久之乃進太牢之饌加珍羞  
具品引太尉無忌司空勳越王貞趙王福曹王明及左  
屯衛將軍程知節並入執爵進俎上至神座前拜哭奠  
饌閱先帝先后衣服拜辭訖行哭出寢北門乃御小輦  
還宮高宗永徽二年有司言謹按獻陵三年之後每朔  
及月半上食其冬夏至伏臘清明社等節日亦上食其



昭陵請依獻陵故事上從之六年正月謁於昭陵有司  
先設儀衛於陵寢質明七廟子孫二王後百僚州鎮藩  
牧四夷君長等並陪列於位皇帝降輦入次易服出次  
行哭就位再拜擗踊慟絕禮畢又改服奉謁寢宮其妃  
嬪公主先於神座左右侍列如平生帝入寢門即哭瞻  
視幄座踊絕於地進至東階西面再拜號哭乃進牢饌  
珍羞引三公諸王並入執爵進俎帝至神座前再拜哭  
自奠饌閱先帝先后衣服更增感絕拜辭訖行哭出寢



北門景龍二年是時每日奠祭太常博士彭景直上疏  
曰謹按三禮正文無諸陵日祭之事又按禮論譙周祭  
志云天子之廟始祖及高祖祖考皆每月朔加薦新以  
象平生朔食也謂之月祭二祧之廟時祭無日祭此譙  
周所著與古禮義合本無日祭之文今諸侯月祭有朔  
日月半并諸節日料則古禮殷事之義矣諸節日猶薦  
新之義矣故鄭玄注禮記云殷事朔日月半薦新之奠  
也又注儀禮云月朔月半猶平常之朝夕也大祥之後



即四時焉此則古者祭皆在廟近代以來始分月朔月  
半及諸節日祭於陵寢至後漢陵寢致祭無明文以言  
自魏三祖以下不於陵寢致祭並符於古禮至於江左  
亦不崇園寢及齊梁陳其祭無聞今參詳以為三禮者  
不刊之書懸諸日月外傳所記不與經合不可依憑其  
諸陵請准禮停日祭帝曰禮因人情事有沿革陵寢如  
昨祇薦是常乍覽此奏但增哀慕乾陵宜依舊朝晡進  
奠昭獻二陵每日一進以為恒式舊制每年四季之月



常遣使往諸陵起居是日太常博士唐紹上疏曰自安宅兆禮不祭墓當謂送形而往山陵為幽靜之宮迎精而返宗廟為享薦之室但以仲月命使巡陵鹵簿衣冠禮容必備自天授以後時有起居因循至今乃為常事起者以起動為稱居者以居止為名叅候動止何如義非陵寢之法生事以禮必勤於定省死葬以禮宜闕於安厝豈可以事居之道行送徃之禮敢辭命使勞繁但恐不安靈域又降誕之日穿針之辰皆以續命為名時



人多有進奉今聖靈日遠仙駕難攀進止起居恐乖先  
典請停四季及降誕并節日起居陵使但准式二時巡  
陵庶義合禮經陵寢安謐不從開元二十年四月制曰  
寒食上墓禮經無文近代相傳浸以成俗士庶有不合  
廟享何以用展孝思宜許上墓同拜掃禮於塋南門外  
奠祭饌訖泣辭食餘饌任於他處不得作樂仍編入五  
禮永為恒式二十三年四月勅獻昭乾定橋恭六陵朔  
望上食歲冬至寒食日各設一祭如節祭共朔望日相



逢依節祭料橋陵除此日外仍每日進半口羊食天寶  
二年七月勅曰朕承丕業肅恭祀事至於諸節常修薦  
享且詩著授衣令存休澣在於臣子猶及恩私恭事園  
陵未標令式自今以後每至九月一日薦衣於陵寢貽  
範千載庶展孝思且仲夏端午事無典實傳之淺俗遂  
乃移風況乎以孝道人因親設教變游衣於漢紀成獻  
服於禮文宜宣示庶僚令知朕意

初顯慶五年二月二十四日高宗以每年

二時太常少卿分行二陵事重人輕又不備鹵簿威儀有闕乃詔三公行事太常卿少卿為副太常造鹵簿事



畢則納於本  
司仍著於令



通典卷五十二



欽定四庫全書薈要卷九千一百七十一

史部

通典卷五十三

唐 京 兆 杜 佑 君 卿 纂

禮十三 吉十二

大學

虞 夏

商

周

漢

後漢

魏

晉

東晉

宋

齊

後魏

隋

大唐

有虞氏大學為上庠小學為下庠

大學篇曰古之欲明  
明德於天下者先治

其國欲治其國者先齊其家欲齊其家者先修其身欲  
修其身者先正其心尊師敬長而大學之道著焉學記  
曰君子如欲化民成俗其必由學乎王不琢不成器人  
不學不知道是故古之王者建國君民教學為先魏文



侯孝經傳曰大學中學也庠言養也所以養雋德也舜命夔曰汝典樂以教胄子胄子國子也

○夏后

氏大學為東序小學為西序

次序先王之道而學之

○殷制大學

為右學小學為左學又曰瞽宗

王制曰小學在公宮南之左大學在郊鄭玄云

學所以學士之宮也尚書傳曰百里之國二十里之郊七十里之國九里之郊五十里之國三里之郊宗尊也瞽無目之名以喻童蒙又云瞽矇之所宗也○周制大學為東膠小學為虞

庠

膠之言糾也所以糾收學士也鄭注祭義云周有四郊之虞庠也以小學為虞庠之制

又云天

子曰辟雍

辟明也雍和也以明和為名化道天下之人使之成士或又云辟者圓壁也雍之以水而

圓象天於陽德之施行周流無極使學者進德而不已亦所以明和政教之至崔靈恩云學制有二一云制與



明堂同體五室四堂在一基之上四方堂則以其方名  
學中央堂謂之大學二云凡立學之法有四郊及國中  
在東郊曰東學並方名之在國中謂之  
大學故鄭注祭義曰周有四郊之虞庠

王太子王子羣

后之太子卿大夫元士之適子國之俊選皆造焉

王之王之

庶子也羣后  
公及諸侯

樂正崇四術立四教

樂正樂官之長掌國  
子之教幼者教之於

小學長者教之於大學尚書傳曰  
年十五始入小學十八始入大學

春秋教以禮樂冬夏

教以詩書

春夏陽也詩樂者聲聲亦陽也  
秋冬陰也書禮者事事亦陰也

師氏掌以媿

詔王

馬融曰媿媿道也告王以善道師  
者教人以事而諭諸德也媿音美

以三德教國子

一曰至德以為道本

馬融曰德行內外之稱在心為德  
施之為行至德者中德也中庸曰



天命之謂性率性之謂道失中庸則無以至道故曰以  
為道本鄭玄曰至德中和之德覆幬持載含容者也

二曰敏德以為行本

敏德仁義  
順時者也

三曰孝德以知逆惡

馬融

曰教以孝德使知逆惡之不可為也鄭  
玄曰孝德尊祖愛親所以守其生也

教三行一曰孝

行以親父母

善事父母之  
行盡其愛敬

二曰友行以尊賢良

馬融曰  
教以朋

友之行使  
擇益友

三曰順行以事師長

馬融曰師德所  
不如也長者

凡國之

貴游子弟學焉

王公之子弟游  
無官司者也

凡學必時春夏學干戈

秋冬學羽籥皆於東序

干盾也戈勾子戟也干戈萬舞  
象武也用動作之時學之羽籥

籥舞象文用安靜之時學之  
詩云左手執籥右手秉翟

春誦夏絃太師詔之瞽宗



秋學禮執禮者詔之冬讀書典書者詔之禮在瞽宗書

在上庠

周立三代之學學書於有虞氏之學典謨之教所興也學舞於夏后氏之學文武備也學禮樂

於殷之學功成治定與己同也誦謂歌樂也絃謂以絲播詩陽用事則學之以聲陰用事則學之以事者也

大學之禮雖詔於天子無北面所以尊師也

尊師重道馬不使處

臣位也武王踐阼召師尚父而問焉曰昔黃帝顓頊之道存乎意亦忽不可得見與師尚父曰在丹書王欲聞之則齊矣王齊三日端冕師尚父亦端冕奉書而入負屏而立王下堂南面而立師尚父曰先王之道不北面王行西折而南東面而立師尚父西面道書之言大戴禮保傳篇曰帝入東學尚親而貴仁則親疎有序而恩相及矣入西學尚賢而貴德則聖智在位而功不匱矣入南學尚齒而貴信則長幼有差而人不誣矣入北學尚



貴而尊爵則貴賤有等而下不踰矣入大學承師而問道退習而端于太傅則德智長而理道得矣

大學

之教也時教必有正業

業必先王經典

古之教者家有塾黨有

庠術有序國有學

術當為遂古者仕焉而已者歸教於閭里朝夕坐於門側之堂謂之塾周

禮五百家為黨萬二千五百家

比年入學中年考校

中

為遂黨屬於鄉遂在遠郊之外也間歲則考學者之德行三歲大比乃考焉

一年視離經辨志三年視敬業

樂羣五年視博習親師七年視論學取友謂之小成九

年知類通達強立而不反謂之大成夫然後足以化民易

俗近者說悅服而遠者懷之此大學之道也王制耆老皆



朝於庠元日習射上功習鄉上齒大司徒帥國之俊士

與執事焉

將習禮使之觀焉此庠謂鄉學

又修六禮以節民性明七教以

興民德齊八政以防民淫一道德以同俗養耆老以致

孝恤孤獨以逮不足上賢以崇德簡不肖以絀惡

司徒地官

卿掌邦教者

命鄉簡不帥教者以告於王王命三公九卿大

夫元士皆入學不變王親視學

亦謂使習禮以化之也不變王又親臨視重棄

賢者之子孫也此習禮皆於大學也

不變命國之右鄉簡不帥教者移之

左命國之左鄉簡不帥教者移之右如初禮

中年考校而又不變



轉徙其居覲其見  
新人有所化也

不變移之郊

郊鄉界之外也稍出遠之

不變移之

遂遂郊外也大夫掌使習禮也

不變屏之遠方終身不齒

遠方九州之外也頃

秦始皇焚書坑儒  
大學從此缺矣

○漢高帝以叔孫通為奉常諸弟子

共定禮儀者咸為選首其後亦未遑庠序之事至孝文

時頗登用

言少用文學之士也

然帝本好刑名之言及孝景不任

儒學竇太后又好黃老術故諸博士具官待問未有進

者

具官謂備員而已

武帝立後竇太后崩田蚡為丞相黜黃老

刑名百家之言延儒者百數

自漢興言易有淄川田生言書有濟南伏生言詩於



魯則申培公於齊則轅固生燕則韓太傅嬰言禮則魯高堂生言春秋於齊則胡毋生於趙則董仲舒而公孫弘為丞相封侯天下靡然向風矣培音陪制曰蓋聞導人以禮風之以樂今

禮廢樂崩朕甚愍焉故詳延天下方聞之士咸登諸朝

詳悉也方道也有其令禮官勸學講議洽聞舉遺興禮

以為天下先舉遺謂經典遺逸者求而舉之太常議曰聞三代之道鄉

里有教勸學興禮宗化厲賢以風四方太平之原也因

舊博士置弟子五十人太常擇年十八以上儀狀端正

者補博士弟子事具選舉中自景帝時文翁為蜀郡守設學校選舉張叔等十餘人入京就學



既成就乃遣張叔分教蜀中子弟自是蜀之學者比於齊魯焉昭帝舉賢良文學增博士弟子員數滿百人至成帝時劉向請興辟雍設庠序

帝下公卿議會向病卒成帝末增弟子員三千人歲餘

如故及王莽為宰衡欲耀衆庶遂興辟雍增元士之子

得受業如弟子甲乙之科

具選舉中

○後漢質帝本初元年

詔大將軍以下至六百石悉遣子弟就學每春秋輒於

鄉射月一會有勸勉進用之端於是遊學者增至三萬

餘生自本初後二十四年高生皓首見拔者少桓帝建



和初詔諸學生課試補官

具選舉篇

元嘉二年詔曰書生汝

南胡憲陳留恭爽或六十以下常以月朔會辟雍垂

白安貧童子潁川王通通經拜太子舍人因試憲等補

郎舍人後皆限六十以上七十以下年有增減不應得

試

易凡天地之數五十有五此所以成變化令五十在試科是應天地之數也

永壽二年復

課試諸生補郎舍人

具選舉篇

獻帝建安中侍中鮑衡奏按

王制立大學小學自王太子以下皆教以詩書而升之

司馬謂之賢者任之以官故能致刑措之盛立太平之



化也今學博士並設表章而無所教授兵戎未戢人並在公而學者少可聽公卿二千石六百石子弟在家及將校子弟見為郎舍人皆可聽詣博士受業其高才秀達學通一藝太常為作品式從之

晉摯虞決疑云漢初置博士而無弟子後

置弟子五十人與博士俱共習肄禮儀又增滿五百人漢末至數千人

○魏文帝黃初五

年立大學於洛陽時慕學者始詣大學為門人滿二歲試通一經者稱弟子不通一經罷遣弟子滿二歲試通二經者補文學掌故不通經者聽須後輩試試通二經



亦得補掌故掌故滿二歲試通三經者擢高第為太子舍人不第者隨後輩復試試通亦為太子舍人舍人滿二歲試通四經者擢其高第為郎中不通者隨後輩復試試通亦為郎中郎中滿二歲能通五經者擢高第隨才叙用不通者隨後輩復試試通亦叙用

齊王正始中劉馥上疏簡

高門子孫為生曰黃初以來崇立大學二十餘年而成者蓋寡由博士選輕諸生避役高門子孫恥非其倫故學者雖有其名而無其實雖設其教而無其功宜高選博士取行為人表經任人師者掌教國子依遵古法使二千石以上子孫年從十五皆入大學明制黜陟陳榮辱之路不從吳孫休永壽元年立學制曰古者建國教



學為先所以遵理為時養器也宜按舊制置學宮立五經博士覈取應選加其寵祿見吏之中及將吏子弟有志好者各令就業一歲課試差其品第加以位賞使見之者樂其榮聞之者羨其稱以悖王化以正風俗未行也

○晉武帝初大學生三千人太始八年有司奏大學生七千餘人才任四品聽留詔曰已試經者留之大臣

子弟堪受教者令入學其餘遣還郡國咸寧二年起國

子學

法周禮國之貴游子弟國子受教於師者也

惠帝元康三年以人多猥

雜欲辦其涇渭於是制立學官品第五以上得入國學

○東晉元帝時太常賀循上言尚書被符經置博士一



人又多故歷紀儒道荒廢學者能兼明經義者少且春秋三傳俱出聖人而義歸不同自前代通儒未有能通得失兼而學之者也況今學義甚艱不可令一人總之今宜周禮儀禮二經置博士二人春秋三傳置博士三人其餘則經置一人合八人太常車盾上言按二漢舊事博士之職唯舉明經之士遷轉各以本資初無定班魏及中朝多以侍中常侍儒學最優者領之職雖不同漢氏盡於儒士取用其揆一也今博士八人愚謂宜依



魏氏故事擇朝臣一人經學最優者不繫位之高下常以領之每舉太常共研厥中其餘七人自依常銓選太興初欲修立學校唯周易王氏尚書鄭氏古文孔氏毛詩周官禮記論語孝經鄭氏春秋左傳杜氏服氏各置博士一人其儀禮公羊穀梁及鄭易皆省不置博士

太常

荀崧上疏曰昔武皇帝崇儒術以賈馬鄭杜服孔王何之徒章句傳注衆家之學置博士十九人二十州之中師徒相傳學士如林猶選張華劉寔居太常之官以重儒教伏聞節省之制皆三分置二博士舊員十有九人今五經合九人准古計今猶未中半九人已升猶宜增置周易有鄭氏注其書根源誠可深惜儀禮所謂曲禮



也鄭玄於禮特明皆有證據昔周之衰孔子作春秋左丘明子夏造膝親受孔子沒丘明撰其所聞為之傳微辭妙旨無不精究公羊高親受子夏立於漢朝多可採用穀梁赤師徒相傳諸所發明或是左氏公羊不載亦足有所訂正臣以為宜各置一

孝武帝太元初於中堂

立行大學於時無復國子生置太學生六十人國子生

權銓大臣子孫六十人事訖罷

其國子生見祭酒博士單衣角巾執經一卷以

代手板自穆帝至孝武並以中堂為大學太元九年尚書

謝石請興復國學以訓胄子頒下州郡普修鄉校帝納其言明年選公卿二千石子弟生增造廟房屋百五十



五間而品課無章君子耻與其列國子祭酒殷茂上言

臣聞舊制國學生皆取冠族華胄比列皇儲而中混雜  
蘭艾遂令人情耻之詔雖褒納竟不施行○宋武帝詔

有司立學未就而崩文帝元嘉二十年立國學二十七  
年廢明帝太始中初置總明觀祭酒一人有元儒文史

四科科置學士十人○齊高帝建和四年詔立國學置學

生五十人取王公以下子孫年十五以上二十以下家

去都二千里為限帝崩乃以國諱廢武帝永明三年詔



立學乃省總明觀召公卿以下子弟置生二百二十人

其年秋中悉集東昏侯永元初詔依永明舊事廢學時

有司奏國學大學兩存焉

領國子監助教曹思文上表曰古之建國君人者必教學

為先將以節其邪情化人成俗今制書既下而廢學先聞將恐觀國之光有以闕也若以國諱宜廢昔漢武立學爰洎元始百餘年中未嘗暫廢其間豈無國諱矣永明以德太子故廢斯非古典尋國之有學本以興化致禮故記云天子出征受命於祖受成於學今之國學即古之大學天子入國學以行禮也太子入國學以齒讓也大學之與國學斯是晉代殊其士庶異其貴賤耳然貴賤士庶皆須教國學大學兩存之可也時立學太尉王儉復依晉代國子生單衣角巾執經代手板也

○後魏道武帝初定中原始



於平城立大學置五經博士生員千餘人天興二年春

增國子大學生員三千人太武始光三年別起大學於

城東後徵盧元高允等令州郡各舉才學於是人多砥

厲儒術轉興獻文帝天安初立鄉學郡置博士二人助

教二人學生六十人後令大郡立博士二人助教四人

學生百人次郡立博士二人助教四人學生八十人中

郡博士一人助教二人學生六十人下郡立博士一人

助教一人學生四十人郡縣學始乎此矣孝文太和



改中書為國子又開皇子之學及遷都洛邑立國子大學四門小學○隋文帝開皇中國子寺不隸太常自前代皆屬太常也○大唐武德元年詔皇族子孫及功臣子弟於秘書外省別立小學七年詔諸州縣及鄉並令置學有明一經以上者有司試策加階叙貞觀五年太宗數幸國學遂增築學舍千二百間國學太學四門亦增生員其書算各置博士凡三千二百六十員其屯營飛騎亦給博士授以經業無何高麗百濟新羅高昌吐



蕃諸國酋長亦遣子弟請入國學之內八千餘人國學

之盛近古未有龍朔二年東都置國子監丞主簿錄事

各一員四門博士助教四門生三百員俊士二百員置

弘文館於上臺生徒三十人置崇文館於東宮生徒二

十人

皆以皇族總麻以上親皇太后皇后大功以上親散官一品中書門下平章事六尚書功臣身食實

封者京官職事正三品供奉官三品子孫京官職事從三品中書黃門侍郎子孫為之並尚書省補西京

國子監領六學

生徒皆隸尚書省補

一曰國子學生徒三百人

分

五經一經六十人以文武官三品以上及國公子孫從二品以上之曾孫為之

二曰大學生徒



五百人

每一經百人以四品五品及郡縣公子孫及從三品之曾孫為之

三曰四門學

生徒千三百人

分經之制與大學同其五百人以六品七品及侯伯子男之子為之其八百人

以庶人之俊造者為之

四曰律學生徒五十人

取年十八以上二十五以下以八品

九品子孫及庶人之習法令者為之

五曰書學生徒三十人

以習文字者為之

六

曰算學生徒三十人

以習計數者為之

凡二千二百一十人

縣生徒有差

州縣學生門蔭與律書算學同諸生皆限年十四以上十九以下皆郡縣自補京都

八十員大都督中都督府上郡各六十員下都督府中郡各五十員下郡四十員京縣五十員上縣四十員中

縣三十員下縣二十員也

凡諸學皆有博士助教授其經義每歲仲



冬郡縣館監課試其成者長吏會屬僚設鄉飲之禮開  
元七年十月皇太子詣國學行齒胄禮二十六年正月  
赦文古者鄉有序黨有塾將以弘長儒教誘進學徒化  
人成俗率由於是其天下州縣每一鄉之內里別各置  
一學仍擇師資令其教授又勅諸州鄉貢見訖令就國  
子監謁先師學官為之開講所司設食弘文崇文館學  
生及監內學生亦許聽焉天寶初明經進士習爾雅九  
載國子監置廣文館知進士業博士助教各一人十二



載七月舉人不得充鄉貢皆補學生四門俊士停之永  
泰二年正月國子祭酒蕭昕上言請崇儒學以正風教  
勅曰頃以戎狄多虞急於經畧大學空設諸生蓋寡絃  
誦之地寂寥無聲函丈之間殆將不掃上序及此甚用  
憫焉其諸道節度觀察都督防禦使等朕之腹心久鎮  
方面眷其子弟各奉義方并宰相朝官及神策六軍子  
弟欲習業者自今以後並令補國子學生欲其業重竄  
金器成琢玉日新厥德代不乏賢其中身雖有官欲附



學讀書者聽其學官委中書門下即簡擇行業堪為師範者充學生員數多少所習經業考試等第并所供糧料及脩理間各委本司作事件聞奏

諸侯立學

周

後漢

東晉

周制諸侯學曰類宮

類之言班所以班政教五經通義云泮水者泮之言半也天子曰辟

雍謂以土雍水外員如壁故曰辟雍義取四方來觀者平均耳泮宮水雍其半蓋東西門以南通水北無水也

類音

王制天子命之教然後為學

崔靈恩云諸侯為學之法但一堂之上不

為五室唯南向為之置立之處一如時王之法貴尚是同然則周之諸侯大學東膠在王宮之左小學虞庠在



西郊所以知一如時王之法者鄭玄注王制小學在公  
宮南之左大學在郊云殷諸侯置學之處得同天子

魯立三代之學米廩有虞氏之庠也序夏后氏之序也

瞽宗殷學也

庠序亦學也庠之言詳也於以考禮詳事也魯謂之米廩虞帝上庠今歲築盛之委

馬序次王事也瞽宗樂師瞽矇之所宗也古者有道有德者教焉死則以為樂祖於此祭之也崔靈恩云凡諸侯之子入學之法亦以十年而出就外傳學書計入學之時祭先聖先師釋奠一如王子之法○後漢

建安末魏國作頻宮於鄴城南○東晉穆帝永和中征

西將軍庾亮在武昌開置學官起立講舍亮家子弟及

叅佐大將子弟悉令入學四府博學識義通涉文學經



論者建儒林祭酒班同三署厚其供給皆妙選邦彥必  
有其實者以充此舉近臨川臨賀二郡並求修復學校  
若非束脩之流禮教所不及而欲階緣免役者不得為  
生明為條制令法清而人貴

教曰人情重交而忽財好  
逸而惡勞學業致苦而錄

答未厚由捷徑者多故莫肯用心洙泗邈遠風雅彌替  
後生放縱不復憲章典謨臨官宰政者務目前之理遂  
令詩書荒廢頌聲寂寥昔魯秉周禮齊不敢侮范會崇  
典晉國以理楚魏之君皆阻帶山河而不能保禮義之  
固孰與金城湯池哉今江表晏然王道日崇三時既務  
五教並修軍旅已整俎豆無廢庸非善哉便處分安學  
校處所又繕造禮器將  
行大射之禮亮死尋廢



釋奠

周

隋 魏

大 唐

東 晉

宋

齊

梁

北 齊

周制凡始立學必釋奠於先聖先師及行事必以幣

謂

子命之教始立學官者也先聖若周公孔子

凡釋奠者必有合也

國無先聖先師則所

釋奠者當與鄰國合也

有國故則不

故謂國有可為先聖先師者若唐虞有夔伯夷周有周公

魯有孔子各自奠之不合之也

凡學春官釋奠於先師秋冬亦如之

謂官

詩書禮樂之官也周禮凡有道者有德者使教焉死則以為樂祖祭瞽宗此之謂先師之類不言夏從春可知

釋奠者設薦饌酌而已無迎尸以下之事

始立學者既饗器用幣

禮樂之器成則饗之

又用幣告先聖先師以器成也

然後釋菜

告先聖先師以器成乃時將用也學記曰太學始教皮弁



祭菜示敬道也鄭玄曰禮先聖先師也菜芹藻之屬也

不舞不授器

釋菜禮輕也釋奠則舞舞

則授器司馬之屬司兵司戈司盾祭祀授舞者兵也

乃退儐於東序一獻無介語

可也

言乃退者謂得立三代之學者釋菜於虞庠則儐賓於東序也魯之學有米廩東序瞽宗也

天

子視學大昕鼓徵所以警衆也

早昧夾擊鼓以召庶也警猶起也凡用樂大胥

以鼓徵舉士

衆至然後天子至乃命有司行事興秩節祭先

師先聖焉

興猶舉也秩常也節猶禮也使有司攝其事舉常禮焉祭先師先聖不親祭之者視學觀

禮耳非為彼報也

有司卒事反命

告祭畢也祭畢天子乃入

將出征受命於

祖告祖也

受成於學

定兵謀也

出征執有罪反釋奠於學以訊



馘告

釋某奠幣禮先師也訊馘所生獲斷耳者詩云執訊獲醜又曰在類獻馘馘或為國

○魏齊

王正始中每講經徧輒使太常釋奠於辟雍以大牢祠

孔子以顏回配○晉武帝太始七年惠帝元康三年二

釋奠皆於大學太始六年元康五年二行鄉事皆於辟

雍

鄉事鄉飲酒禮也

惠帝之為太子及愍懷太子講經竟並親

釋奠於大學○東晉明帝之為太子亦行釋奠禮成穆

孝武三年皆親釋奠惟成帝在辟雍自是一時制也孝

武以大學在水南懸遠有司儀依穆帝升平元年於中



堂權立行大學釋奠禮畢會百官六品以上

時無國子生有司奏

應須二學生百二十人大學生取見人六十國子生權銓大臣子孫六十人事訖罷也

○宋文帝

元嘉二十二年太子釋奠採晉故事

裴松之議應舞六佾宜設軒懸之樂

牲牢器用悉依上公

祭畢親臨學宴會太子以上悉在○齊武帝

永明三年有司奏宋元嘉舊事學生到先釋奠先聖先

師禮又有釋菜未詳今當行何禮用何樂及禮器時從

喻希議用元嘉故事設軒懸之樂六佾之舞牲牢器用

悉依上公

尚書令王儉議周禮春入學釋菜合舞記云始教皮弁祭菜示敬道也又云始入學必釋



奠先聖先師中朝以來釋菜禮廢金石俎豆皆無明文  
方之七廟則輕比之五祀則重陸納車屑謂宣尼廟宜  
依亭侯之爵范甯欲依周公之廟用王者儀范宣謂當  
其為師則不臣之釋奠日宜備帝王禮樂此則車陸失  
於過輕二范傷於太重喻希云若王者自設禮樂則肆  
賞於致敬之所若欲嘉美先師則須所況非備細尋此  
說守附情理皇朝屈尊弘教惟以師資引同○梁武帝  
上公即事惟允元嘉裴松之議故事可依也

天監八年皇太子釋奠周捨議既惟大禮請依東宮元

會太子著絳紗褱

音博衣領也

樂用軒懸合升殿坐者皆服

朱衣帝從之又有司以為禮云凡為人子者升降不由

阼階吏部郎徐勉議鄭玄云由命士以上父子異宮宮



室即異無不由阼階之禮請釋奠及宴會太子升堂並  
宜由東階若輦駕幸學自然中階其預會賓客依舊西階  
大同七年皇太子表其子寧國臨城公入學時議者以  
與太子有齒胄之議疑之僕射臣纘等以為參點回路  
並事宣父鄒魯稱盛洙汶無議師道既光得一資敬無  
虧亞二制可○北齊將講於天子講畢以一大牢釋奠  
孔宣父配以顏回列軒懸樂六佾舞皇太子每通一經  
及新立學必釋奠禮先聖先師每歲春秋二仲常行其



禮每月朔制祭酒領博士以下及國子諸學生以上大學四門博士升堂助教以下大學諸生階下拜孔聖揖顏回日出行事其郡學則於坊內立孔顏廟博士以下

亦每月朝

張憑議曰不拜顏子者按學堂舊有聖賢之像既備禮盡敬奉尼父以為師而未詳顏子

拜揖之儀臣以聖者君道也師者賢臣道也若乃推舜禹於君位則稷契與我並為臣矣師元風於洙泗則顏子吾同門也夫大賢恭己既揖讓於君德回也如愚豈越分於人師哉是以王聖佐賢而君臣之義著拜孔揖顏而師資○隋制國子寺每歲四仲月上丁釋奠於先

聖先師年別一行鄉飲酒禮

州縣學則以春秋仲月釋奠亦每年於學一行鄉飲



酒禮○大唐武德二年於國子學立周公孔子廟各一所

四時致祭

貞觀二十一年制左丘明以下二十二人同享

初以儒官自為祭主

直云博士姓名昭告於先聖又州縣釋奠亦博士為主  
許敬宗奏曰秦漢釋奠無文魏氏則太常行事自晉宋  
以降時有親行而學官為主全無典實在於臣下理不  
合專今請國學釋奠令國子祭酒為初獻詞稱皇帝謹  
遣仍令司業為亞獻博士為終獻其州學刺史為初獻  
上佐為亞獻博士為終獻縣學令為初獻丞為亞獻主



簿及尉通為終獻修附禮令以為永制七年二月高祖幸國子學親臨釋奠引道士沙門與博士雜相駁難久之貞觀十四年二月太宗幸國子學觀釋奠永隆二年二月皇太子親行釋奠之禮開耀元年二月皇太子釋奠於國學景龍二年皇太子將親釋奠於國學有司草儀注令從臣皆乘馬著衣冠太子左庶子劉子玄進議曰古者自大夫以上皆乘車而以馬為駢服魏晉以降迄於隋氏朝士又駕牛車至如李廣北征解鞍憩息馬



援南伐據鞍顧盼斯則鞍馬之設行於軍旅戎服所乘  
貴於便習者也按江左官至尚書郎而輒輕乘馬則為  
御史所彈又顏延年罷官後好騎馬出入閭里當時稱  
其放誕此則專車憑軾可擐朝衣單馬御鞍宜從褻服  
求之近古灼然之明驗也褒衣博帶方履高冠本非馬  
上所施自是車中衣服宜長裙廣袖檐如翼如鳴佩紆  
組鏘鏘奕奕馳驟於風塵之內出入於旌祭之間儻馬  
有驚逸人從顛墜遂使屬車之右遺屨不收清道之傍



絳驂相續因以受嗤行路有損威儀其乘馬衣冠竊謂  
宜從廢改皇太子令附外宣行仍編入令以為常式開  
元十一年詔春秋釋奠用牲牢其屬縣用酒脯而已二  
十七年八月因釋奠文宣王始用宮懸之樂二十八年  
二月勅文宣王廟春秋釋奠宜令攝三公行禮著之常  
式國子祭酒劉拔奏准故事釋奠之日羣官道俗等皆  
合赴監觀禮請依故事著之常式制可之其儀具開元  
禮



祀先代帝王

名臣附

漢

後漢

魏

東晉

後魏

隋

大唐

漢武帝時有人言古者天子以春解祠祠黃帝用一臬

破鏡

張晏曰黃帝五帝之首也春歲之始也臬惡逆之鳥方士虛誕云以歲始祓除凶災令神仙之帝食

惡逆之物使天下為逆者破滅臬名食母破鏡名食父如驅首而武眼黃帝欲絕其類使百司皆用焉漢使東郡送臬五月五日作羹以賜百官解祠者解罪求福也

○後漢章帝元和春東巡

狩使使者奉一大牢祠帝堯於濟陰○魏武帝少時漢

太尉橋玄獨先禮異焉故建安中遣使祠以大牢

蜀主劉禪

景曜六年詔為丞相諸葛亮立廟於沔陽先是所在各請立廟不許百姓遂私祭之或以為可立於京師禪皆



不納步兵校尉習崇中書侍郎向充等言於禪曰自漢以來小德而圖形立廟者多矣况亮德範遐邇勲蓋季世而蒸嘗止於私門廟貌闕而莫立非所以存德念功遠追在昔也今若盡從人心則黷而無典建之京師又逼宗廟宜因近其墓立之於沔陽使所屬以時賜祭凡其臣故欲奉祠者皆限至廟斷其私祀於是從之何承天駸之曰周禮凡有功者祭於大蒸故後代遵之元勲配饗充等曾不是式禪又從之蓋非禮也○東

晉孝武帝寧康三年七月故事禮臯陶於廷尉寺新禮移祀於律署以同祭先聖於大學舊祀以社日新改用

孟秋以應秋政

摯虞按虞書臯陶作士惟明克允國重其功人思其當是以獄官禮其神繫者

致其祭功在斷獄之成不在律令之始也大學之祀義同太常故祭於大學律之署卑於廷尉移祀於署是去



重而就輕非正署廢興無常宜如舊祀於廷尉祭用仲  
春義取重生改用孟秋以應刑殺理未足以相易宜定  
新禮皆如舊制○後魏文成帝東巡歷橋山祀黃帝孝文太和

十六年詔曰法施於人祀有明典立功垂惠祭有常式  
其孟春應祀者頃以事殷遂及今日可令以仲月而饗  
祀焉凡在祀令者有五帝堯樹則天之功興巍巍之治  
可祀於平陽虞舜播太平之風致無為之化可祭於廣  
甯夏禹禦洪水之災建天下之利可祀於安邑周文公  
制禮作樂垂範萬葉可祀於洛陽其宣尼廟已於中省



別勅有司行事自文公以上可令當界牧守各隨所近  
攝行祀事皆用清酌尹祭也

曲禮曰脯曰尹祭

○隋制使祀先

代王公帝堯於平陽以契配帝舜於河東咎繇配夏禹  
於安邑伯益配商湯於汾陰伊尹配文王武王於澧渭  
之郊周公召公配漢帝於長安蕭何配各以一太牢而  
無樂配者饗於廟庭○大唐前修禮令無祭先代帝王  
之文禮部尚書許敬宗等奏謹按禮記祭法云聖王之  
制祭祀也法施於人以死勤事以勞定國能禦大災能



捍大患則祀之其漢高祖祭法無文但以前代迄今多  
行秦漢故事始皇無道所以棄之漢祖典章法垂於後  
自隋以上亦在祠例今請聿遵故實三年一祭以仲春  
之月天寶六載正月制三皇置一廟五帝置一廟有司  
以時祭饗至七載五月詔三皇以前帝王宜於京城內  
共置一廟仍與三皇五帝廟相近以時致祭天皇氏地  
皇氏人皇氏有巢氏燧人氏其祭料及樂請准三皇五  
帝廟以春秋二時饗祭歷代帝王肇跡之處未有祠宇



者所在郡置一廟饗祭仍取當時將相德業可稱者二人配饗

老君祠

先賢附

後漢

大唐

後漢桓帝延熹八年使中常侍之陳國苦縣祠老子九年親祠老子於濯龍中文廟為壇飾純金釭器設華蓋座用郊天樂。○大唐乾封元年追號老君為太上玄元皇帝文明元年九月冊玄元皇帝妻為先天太后立尊像於老君廟所開元二年三月親祠玄元皇帝廟追尊



玄元皇帝父周上御史大夫復追尊為先天太皇仍於

譙郡置廟歲餘一祀以上准先天太后廟例二十九年

兩京及諸州各置廟一所并置崇元館天寶元年親祠

玄元廟又於古今人表昇玄元皇帝為上聖

其時同制  
莊子號南

華真人文子號通元真人列子號冲虛真人庚  
桑子號洞靈真人又以其所著之書並為經

其年九

月改兩京玄元廟為太上玄元皇帝宮

其告饗所奏樂  
降神用混成之

樂送神用  
太乙之樂

二載西京改為太清宮東京改為太微宮天

下諸郡為紫極宮三月勅古之制禮祭用質明義兼取



於尚幽情實緣於既沒我聖祖湛然常在為道之宗既殊有盡之期須展事生之禮自今以後每聖祖宮有昭告宜改用郊時以前行禮四載四月勅比太清宮行事官皆冕服爰及奏樂未易舊名并告獻之時仍陳冊祝既非事生之禮皆從降神之儀且真俗殊倫幽明異數理有非便亦在從宜自今以後每太清宮行禮官宜改用朝服兼停祝版改為清詞於紙上其告獻辭及所奏之樂章朕當別自修撰仍令所司具儀注聞奏十三載



正月詔令有司每至孟月則修薦獻上香之禮仍為常

式

六載五月詔後漢張天師冊贈太師梁貞白陶先生冊贈太保

興元元年十二月詔

太清宮改太常卿亞上香光祿卿終上香改三禮拜為再拜貞元元年正月勅薦饗太清宮亞獻太常卿充終獻光祿卿充仍永為常式

孔子祠

先儒及弟子附

漢

後漢

魏

晉

宋

後魏

北齊

後周

隋

大唐

漢元帝時孔霸以帝師賜爵號褒成君奉孔子後平帝元始初追謚孔子曰褒成宣尼公追封孔均為褒成侯



○後漢光武建武十三年封均子志為褒成侯章帝元

和二年二月東巡狩因幸魯祠孔子七十二弟子

漢晉春秋

曰闕里者仲尼之故宅也在魯城中帝升廟西面羣臣中庭北面皆再拜帝進爵而後坐東觀書云祀禮畢命儒者論難也和帝永元四年徙封為褒尊侯相傳至獻帝初

國絕○魏文帝黃初二年以孔子二十一代孫議郎羨

為宗聖侯邑百戶奉孔子祠令魯郡修舊廟置百石吏

卒守衛○晉武帝太始三年改封孔子二十三代孫宗

聖侯震為奉聖亭侯又詔大學及魯國四時備三牲以



祀孔子明帝太寧三年詔給奉聖亭侯四時祀孔子祭

宜如太始故事○宋文帝元嘉八年奉聖侯有罪奪爵

至十九年又授孔隱之隱之兄子熙先謀逆又失爵二

十八年更以孔惠雲為奉聖侯後有重疾失爵孝武大

明二年又以孔邁為奉聖侯邁卒子莽

誡俱反

嗣有罪失

爵○後魏封孔子二十七葉孫乘為崇聖大夫孝文帝

太和十九年改封二十八葉孔珍為崇聖侯文成帝詔

其宣尼之廟當別勅有司行薦饗之禮○北齊改封三



十一葉孫為恭聖侯○後周武帝平齊改封鄒國公○

隋文帝仍舊封鄒國公煬帝改為紹聖侯○大唐貞觀

十一年封孔子裔德倫為褒聖侯二十一年制以左丘

明卜子夏公羊高穀梁赤伏勝高堂生戴聖毛萇孔安

國劉向鄭衆杜子春馬融盧植鄭玄服虔何休王肅王

弼杜元凱范甯賈逵總二十二人並為先師永徽中制

令改周公為先聖黜夫子為先師顏回左丘明從祀顯慶

二年禮部尚書許敬宗等奏曰准貞觀二十一年詔以孔子為先聖更添左丘明等二十二人與顏子俱配宣



父於太學並為先師今據永徽令改用周公為先聖黜孔子為先師顏回左丘明並為從祀按禮記云凡學春官釋奠於其先師鄭玄注云官為禮樂詩書之官也先師者若禮有高堂生樂有制氏詩有毛公書有伏生可以為之又曰始立學釋奠於先聖鄭注曰若周公孔子也聖則非周即孔師則偏善一經考漢魏已來取捨各異顏回孔子互作先師宣父周公更為先聖求其節文遽有得失所以貞觀之制正夫子為先聖加衆儒為先師而今新令輒事刊改但周公攝政制禮作樂功比王者祀之儒館實貶其功仲尼生衰周之末振文喪之弊祖述堯舜憲章文武弘聖教於六經闡儒風於萬載故孟軻稱生靈以來一人而已自漢以降奕葉繼侯崇奉其聖迄於今日胡可降茲上哲俯入先師且又丘明之徒見行其學貶為從祀亦無故事今請改令從詔於義為允其周公仍依禮配饗武王也

高宗乾封元年正月東巡次兗州鄒



縣頓祭宣父廟贈太師總章元年二月皇太子詣學贈  
顏回太子少師曾參太子少保神龍初詔以鄒魯百戶  
封崇道公宣尼采邑用供薦饗又授裔孫褒聖侯崇階  
朝散大夫仍許子孫以相傳襲開元八年勅改顏生等  
十哲為坐像悉應從祀曾參大孝德冠同列特為塋像  
坐於十哲之次圖畫七十子及二十二賢於堂壁上以  
顏子亞聖親為之贊以書於石閱損以下令當朝文士

分為之贊

時國子司業李元瓘奏稱先聖孔宣父廟先  
師顏子配坐今其像立侍配饗合坐十哲弟



子雖復列像廟堂不應饗祀謹檢祠令何休范甯等二十  
十二賢猶霑從祀其十哲請春秋釋奠列享在二十二  
賢之上七十子請准都監廟堂圖形於壁兼為立贊又  
曾參考道可崇獨受經於夫子請准二十二賢應饗

二十七年八月制夫子追贈謚為文宣王宜令三公持  
節勅命並撰儀注昔緣周公南面夫子西坐今位既有  
殊坐豈仍舊宜補其隆典永作常式自今以後夫子南  
面而坐內出王者袞冕之服以衣之十哲等東西列侍  
顏子淵既云亞聖須優其秩

顏子贈兗國公

閔子騫贈費侯



冉伯牛贈鄆侯

冉仲弓贈薛侯

宰子我贈齊侯

端木子貢贈黎侯

冉子有贈徐侯

仲子路贈衛侯

言子游贈吳侯

卜子夏贈魏侯

又夫子格言參也稱魯雖居七十之數不載四科之目  
頃雖參於十哲終未殊於等倫久稽先旨俾修舊位庶  
乎禮得其序入焉式瞻命尚書右丞相裴耀卿攝太尉  
持節就國子廟冊冊畢所司奠祭亦如釋奠之禮又遣



太子少保崔琳往東都就廟行冊禮又勅兩京及兗州  
舊宅廟像宜改服衮冕其諸州及縣廟宇既小但移南  
面不須改衣服兩京樂用宮懸春秋二仲上丁令三公  
攝行事七十子並宜追贈

曾參贈郈伯

顓孫師贈陳伯

澹臺滅明贈江伯

宓子賤贈單伯

原憲贈原伯

公冶長贈莒伯

南宮子容贈郈伯

公皙哀贈郈伯



曾點贈宿伯

顏路贈杞伯

商瞿贈蒙伯

高柴贈共伯

漆雕開贈滕伯

公伯寮贈任伯

司馬牛贈向伯

樊遲贈樊伯

有若贈卞伯

公西赤贈郈伯

巫馬期贈鄆伯

梁鱣贈梁伯

顏柳贈蕭伯

冉孺贈紀伯

曹卹贈曹伯

伯虔贈聊伯



公孫龍贈黃伯

冉季贈東平伯

秦子南贈少梁伯

漆雕子斂贈武城伯

顏子精贈瑯琊伯

一作子驕

漆雕徒父贈須句伯

壤駟赤贈北徵伯

商澤贈睢陽伯

石作蜀贈石邑伯

任不齊贈任城伯

公夏守贈元父伯

公良孺贈東牟伯

后處贈營丘伯

秦子開贈彭衙伯

奚容蒧贈下邳伯

公肩定贈新田伯



顏襄贈臨沂伯

郭單贈銅鞮伯

句井疆贈淇陽伯

罕父黑贈乘丘伯

秦商贈上洛伯

申黨贈郃陵伯

公祖子之贈期思伯

榮子期贈雩婁伯

縣成贈鉅野伯

左人郢贈臨淄伯

燕伋贈漁陽伯

鄭子徒贈滎陽伯

顏之僕贈東武伯

原亢贈萊蕪伯

樂顏贈昌平伯

一作款

廉潔贈莒父伯



顏何贈開陽伯

叔仲會贈瑕丘伯

狄黑贈臨濟伯

邽巽贈平陸伯

孔忠贈汶陽伯

公西與如贈重丘伯

公西蒧贈祝阿伯

蘧瑗贈衛伯

施常贈乘氏伯

林放贈清河伯

秦非贈汧陽伯

陳亢贈潁伯

申振贈魯伯

琴牢

未詳

顏噲贈朱虛伯

步叔乘贈淳于伯



琴張贈南陵伯

太公廟

大唐

大唐開元十九年四月兩京及天下諸州各置太公廟  
一所以張良配饗春秋取仲月上戊日祭諸州賓貢武  
舉人准明經進士行鄉飲酒禮每出師命將辭訖發日  
便就廟引辭仍簡取自古名將功成業著弘濟生人者  
十人准十哲例霑饗至乾元元年九月十二日太常少  
卿于休烈奏臣昨因秋饗漢高祖廟見傍無侍臣饗太



公廟有張良在側伏以子房生於漢初翊奉高祖坐籌帷幄佐定天下考其年代不接太公自古配食廟庭陪葬陵寢皆取當時佐命同受哀榮太公人臣不合以張良配饗請移於漢祖廟從之上元元年閏四月勅昔周武創業克寧區夏惟師尚父實佐興王況德有可師義當禁暴稽諸古昔爰崇典禮其太公望可追封為武成王有司依文宣王置廟仍委中書門下擇古今名將准文宣王置亞聖及十哲等饗祭之典一同文宣王貞元



四年八月兵部侍郎李紆奏曰太公廟准式以太常少卿充三獻官祝文云皇帝遣某官敢昭告至上元元年追贈為武成王饗祭之典一同文宣王有司因差太尉充獻兼進祝版親署臣伏以太公即周之太師張良漢之少傅聖朝列在祀典已極褒崇載在祝詞必資折中理或過當神何敢歆今者屈禮於至尊施敬於臣佐每請御署並稱昭告竊謂非宜一同文宣王恐未為允臣以為文宣垂訓百代宗師五常三綱非其訓不明有國



有家非其制不立故孟軻稱自生人以來一人而已由是正素王之法加先聖之名樂用宮懸獻羞太尉尊師崇道雅合正經其太公述作止於六韜勲業形於一代豈可擬其盛德均其殊禮哉前件祝文請自今更不進署其敢昭告請改為致祭其獻官請准式太常卿以下詔令百寮集議聞奏兼大理卿于頔等四十六人議同李紓左領軍大將軍令狐建等二十四人議曰當今兵革未偃宜崇武教以尊古重忠烈以勸今欲有貶損非




激勸之道也追尊王位以時祠之為武教之主若不尊其禮則無以重其教也文武二教國宜並立廢一不可況其典禮之制已歷二聖今欲改之恐非宜也至九月有勅以上將軍以下充獻官餘事依李紆所奏其祭饗獻儀具開元禮





通典卷五十三





總校官庶吉士臣侍朝

校對官編修臣莫瞻菴

膳錄監生臣周翥華